



畿輔安瀾志

甯晉泊一卷

原委

附載

隄防

橋渡

水利

畿輔安瀾志

臣王履泰恭纂

甯晉泊一卷

原委

甯晉泊在甯晉縣東南二十五里亦卽大陸澤也一名胡盧河一名北泊

明統志胡盧河在甯晉縣東南自順德府流逕任縣至此匯爲澤卽大陸澤明史地理志甯晉東南有胡盧河其上流卽漳水也深冀羣川悉匯於此方

輿紀要周禮職方冀州藪曰楊紆水經注卽大陸澤  
或曰古有楊城澤流紆回城下因曰楊紆漢置楊屯  
縣後改爲甯晉縣縣東南大陸澤呂氏春秋九藪趙  
之大陸其一也酈道元以爲卽楊紆藪亦謂之薄洛  
水亦謂之廣阿澤今澤東西逕三十里卽漳水也自  
順德府南和任縣達隆平而東北匯大小羣川以注  
於縣境而趙州西境及滹沱河以南諸水亦悉東南  
流至縣境而匯爲大澤每至夏秋之交霖潦爲患則  
漳水滹沱南北交注泛濫甚廣東注深冀二州及阜

城獻縣以東至交河縣而合於滹沱丁度曰胡盧河橫漳之別名也在深冀間橫互數百里冀北之大川河其最矣郡志國朝正德十一年漳河由縣南徙明年滹沱河由縣北徙蓋前此皆匯於胡盧河至此復分引而南北出也畿輔通志胡盧河其上流卽漳水與滏水合流匯大小羣川注此土人稱爲甯晉泊卽北泊也

謹案胡盧河之名前此未之有也五代史周廣順二年契丹將高謨翰以葦筏渡胡盧河至冀州周兵屯

貝州以拒之又顯德二年時契丹屢寇河北輕騎深入曾無藩籬之限其奔突因命王彥超等督兵民濬胡盧河宋史河渠志胡盧河源於西山始自冀州新河鎮入深州武強縣與滹沱河合其後變徙入於大河涪化二年從河北轉運司請自深州新砦鎮開新河導胡盧河凡二百里抵常山以通漕運後廢金史地理志信都縣有胡盧河此胡盧之名所始也其稱北泊者蓋因以大陸澤爲南泊故此名北泊中又自分東南北則在灋河西北者曰北泊在東者曰東泊

在西南者曰南泊總謂之北泊其稱甯晉泊者以其  
在甯晉而稱之畿輔通志以爲士人之稱是也攷通  
典元和志皆以大陸澤在邢深冀三州之地則胡盧  
河亦卽古大陸澤之地澤流通塞廣狹古今不同以  
一大陸澤而分爲二後世於是又有胡盧河之名第  
紀要所引水經注楊紆之文今本無之或是逸文未  
知何據考周禮職方冀州其澤藪曰楊紆爾雅秦有  
楊隲郭璞注今在扶風郿縣西邢昺疏周禮冀州云  
其澤藪曰楊隲

漢志引爾雅作楊紆則隲紆通也

鄭注云所在未聞

又雍州云其澤藪曰弦蒲鄭注云在汧縣然則周禮  
弦蒲卽此楊隄也則是爾雅之楊紆信在秦而周禮  
之楊紆仍未詳也而楊紆旣卽爲弦蒲則周禮有絃  
蒲又有楊紆不已複耶且爾雅明云晉有大陸秦有  
楊隄郭璞注以大陸爲今鉅鹿廣河澤則大陸澤楊  
紆藪定分爲二是皆不能強爲之說者也乃諸志以  
胡盧河大陸澤廣河澤楊紆藪薄洛津俱并爲一水  
何太無別也冀州之楊紆在漢時且未詳所在今乃  
欲以胡盧河實之其不足據不待辨而明也又甯晉



縣志分大陸澤胡盧河爲二謂胡盧河原在大陸澤中非謂胡盧卽大陸也或取其說謂漳滏滹沱古者皆入大陸澤諸書旣皆以胡盧河爲漳水下流則其不得與大陸澤混稱明矣故謂甯晉泊爲胡盧河者誤也則是大陸澤甯晉泊外別有一胡盧河且似胡盧河已爲大陸澤所并而今之甯晉泊竟不知於古爲何水矣可乎古今水道變遷名亦代有改易胡盧河甯晉泊皆爲後起之名惟大陸尙仍舊稱是在古時止有一大陸澤後分爲二乃名胡盧河亦名甯晉

泊耳卽以今之甯晉泊爲古之大陸澤亦無不可而  
以爲楊紆藪則雖有水經注逸文未敢徵信也 又  
案方輿紀要於阜城則云胡盧河在縣西北七里卽  
衡自晉州武強縣流入境於景州則云胡盧河在州  
東北其上源自阜城縣東北流入東光縣又一統志  
衡漳故道遷流無定唐宋以來雖有長蘆胡盧之異  
名實皆漳水下流也今漳水上流東徙逕魏縣元城  
抵館陶入衛僅分一小支由廣宗至新河與滏合滏  
水會衆流由甯晉泊而出至冀州合滹沱河東注謂

之胡盧河並不得以漳水目之矣

謹案廣宗縣新漳河於康熙二十三年斷流不復逕順德府境

不復入甯晉泊一統志所言蓋猶是昔時之形說者

以此又謂古者漳滏合流而入甯晉泊自甯晉泊而

下乃爲胡盧河則甯晉泊非卽胡盧河周顯德宋熙

甯

河渠志熙甯八年發夫增治胡盧河

所濬皆在深冀景滄數州之境

非濬甯晉泊也安得混而爲一其說亦似也第據宋

史河渠志胡盧河源於西山之文則胡盧河別是有

源何得云漳滏下流且所云西山不又在甯晉泊西

平貫泊者爲胡盧河而泊又爲何水耶泥於名稱拘

於今古非觸卽背矣要之大陸爲禹貢河流所過之地其爲廣大可知故深冀景滄之間皆有胡盧河而其源則直自西山衆水匯流而成今胡盧河下流已不可考而甯晉泊則固胡盧河所從出也是甯晉泊實胡盧河何疑又或以胡盧爲薄落之訛或以爲卽長蘆之別名或以爲卽古之泃湖水經注漳水又歷經縣故城西水有故津謂之薄落津又云衡水分爲二水一北出逕堂陽縣故城西其右水東北注出石門謂之長蘆水又云太白渠水東南流謂之百尺溝

百尺溝水東南散流逕歷鄉東而南入抵湖東注衡  
水也豈得皆以胡盧河疑之皆所不取 又案漳滏  
合流在曲周縣境滏陽河舊自任縣大陸澤會滏河  
北流貫甯晉泊而出嘉靖間發真定順德民夫萬人  
濬新滏河卽滏滏會流入泊之上流處明萬厯間滏  
河東徙於是洩大陸澤於甯晉泊者惟新滏一河至  
滏河貫泊而出則滏卽洩泊之河口大而疏暢今惟  
以新挑一河洩泊於滏滏反爲受泊之地口窄而流  
滯腹大而尾閘小於是泊與滏交病隆平甯晉冀州

常不免於水患矣

入泊之河

新澧河出順德府邢臺縣之百泉河卽南澧河北澧河也

詳見大陸澤篇

其名新澧河者由明嘉靖中重爲疏濬故也

自大陸澤北流五里逕崔家橋入隆平縣東南境又北流五里逕舊城村東又北流二十二里逕羊毛圪塔入於甯晉泊

方輿紀要隆平縣東十里自順德府任縣流逕縣界又東北與沙河合注於胡盧河嘉靖十六年以故流

壅塞更加疏濬謂之新灋河

謹案隆平縣志有新灋河又有舊灋河舊灋河今已堙廢不可考

泝河其源有二一出臨縣西七十里之敦與山下東流二十里逕三峽村與臨城之水會

山海經北山經又北百二十里曰敦與之山

謹案與亦作輿

泝水出於其陰而東流注於彭水郭璞注今泝水出中邱縣西窮泉谷東注於堂陽縣入於漳水

漢書

地理志中邱蓬山長谷諸水所出

元和郡縣志敦

與山在臨城縣西南七十里鵲山在內邱縣六十三里昔扁鵲將號太子遊此山採藥因名 太平寰宇記內邱有蓬鵲山一名龍騰山卽漢志蓬山也 金史河渠志臨城縣有敦與山泚水內邱有內邱山泚水 明史地理志臨城南有敦與山西北有泚水東逕鈎盤山與泚水合內邱有泚水 方輿紀要敦與山一名幽淮山

二水合而東流三里逕東豎村則有天臺塞水入焉又東南流四里逕柏暢村是名三斷綠楊河則有乞了山



水入焉

太平寰宇記臨城縣柏暢亭水經云泝水東逕柏暢

亭亭在縣西

漢書水經今無此文

舊縣志泝源有二此爲南泝

在臨城縣西南二十五里流逕柏暢亭至縣五里許  
斷伏不流下二百餘步復出東逕鉤盤山下合沙河  
又東南逕內邱唐山隆平抵任縣入大陸澤俗名三  
斷綠楊河

又東南流逕臨城西又東南逕城南五里則有八里溝  
水入焉又東南流逕鉤盤山又東南流逕西尹村仍入